



Inoqarfinnut isorliunerusuniittunut nunaqarfinnullu periarfissat pillugit inuttut ilanngaammut, nuna tamakkerlugu akileraarutip appasinneruneratigut, ilinniarnermilu taarsigassarsiniarnermi taarsersuinermut iluaqusersuinerit il. il. nunatsinni atulersinnaanerit pillugu Norgemi Finnmarkimut atugassaritineqartut isumassarsiorfigalugit Naalakkersuisut misissueqqullugit peqquneqarnissaannik Inatsisartut aalajangiiffigisassaattut siunnersuut. Misissuinermi periutsit taamaattut nunatsinni atuutsinneqalersinnaanerannut aningaasaqarnikkut allaffissornikkullu pisortanut, namminersortunut innuttaasunullu aningaasatigut malitsigisassaata ilaatinneqassapput. Misissuinerup inernerit kingusinnerpaamik UPA2023-imi inatsisartunut agguanneqariissapput.

(Siumumi Inatsisartunut gruppiat)

(Siullermeerneqarnera)

Demokraatit tapersersortuarpaat, innuttaasut sapingisaaq malillugu kiffaanngissuseqarlutillu aalajangeeqataanissaat. Politikkeritut sinaakkusiissaagut, innuttaasut pitsaanerpaamik namminneq toqqakkaminnik inuuneqarnissaannut periarfissillugit.

Ilai nunaqarfeerannguami najugaqarusuttarput, imminnut kikkut tamarmik ilisarimasumi. Allat illoqarfinni annerusuni, soorlu assersuutigalugu kulturikkut timersornikkullu periarfissaqarnerusuni. Qaquguluunniit akuleruffiginaviangilara inuit ataasiakkaat aaliangigaat. Tamannami suliasarinngilluinnarpara.

Siumup siunnersuuteqarnermini misissortissallugu kissaatigaa, akileraarutip procentiata appasinnerusinnaanera, ilinniartut aningaasanik atugaasa assigisaasaluunniit pitsaanermik utertinniarneqartarnissaat, nunaqarfimmi imaluunniit avinngarusimasumi najugaqaraanni. Taassuma misissortinnissaa uanga pisariaqartinngilara, taamatut immikkoortitsinerit isumaqatiginnginnakkit.

Kalaallit Nunaat nunaassanngilaq, sumi najugaqarneq aallaavigalugu immikkoortitsiffiusoq. Oqareernittut nunatsinni kikkut tamarmik kiffaanngissuseqassapput aalajangernissaminnut, sumi najugaqassallutik. Imaassanngilaq, uagut politikikkut aalajangersimasuni najugaqaraanni pitsaanerusumik atugaqarnissaq periarfissagipput. Tamatta assigiimmik periarfissaqassaagut.

Taamaattumik siunnersuutip itigartinneqarnissaa innersuussutigaa.